



19. oktober 2018

UKA 2018/107

Naqqiut

Siunnersuut 24 august 2018-meersoq naqqiuteqarfigaara.

Naqqiummi naqqiissutaavoq siunnersuuteqartup aqqa Randi Vestergaard Evalsen-miit Niels Thomsen-mut taarsenera.

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Aningaasartuutit sulluunniit Inatsisartunit taakkulu allattoqarfianit aningaasartuutigineqartut kikkunit tamanit takuneqarsinnaangornissaat pillugu taamatullu kikkut tamarmik paasiniaasinnaangornissaat pillugu Inatsisartut Suleriaasiata allanngortinnissaanut Inatsisartut Siulittaasoqarfiat siunnersuuteqaqqullugu peqquneqarnissaanik Inatsisartut aalajangiiffigisassaattut siunnersuut
(Inatsisartunut ilaasortaq Niels Thomsen, Demokraatit)

Tungavilersuut

Demokraatini tungaviusumik isumaqarpugut pisortat aningaasaataannik atuineq ammalluinnartumik malinnaavigineqarsinnaasariaqartoq. Kikkulluunniit takusinnaasariaqaraluarpaat Namminersorlutik Oqartussat kommunillu aningaasanik Inatsisartut (Taamaasillutillu innuttaasut) akuersissutaannik qanoq atuinersut. Siullermik isumaqaratta demokratimi sumiluunniit innuttaasut apeqqusersuinertaqanngitsumik soorunami tamanna pisinnaatitaaffigisariaqaraat. Aappassaattullu akisussaassusilimmik aningaasanik atuinissaq siuarsarneqartussaammat.

Kommunini oqartussaasut eqqarsaatigalugit aamma Naalakkersuisut eqqarsaatigalugit taamatullu oqartussaaffiit taakku ataaniittut eqqarsaatigalugit qularnaarneqarnikuuvoq pisortat aningaasaliissutaannik atuinerup ammasumik malinnaavigineqarsinnaanera pisortat ingerlatsinerat pillugu paasitinneqarsinnaatitaanermut inatsimmi malittarisassat malillugit. (Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat nr. 9, 13. juni 1994-imeersoq). Malittarisassalli taakku Inatsisaertunut Inatsisartullu allattoqarfianut atuutinnngillat, pisortat ingerlatsinerat pillugu paasitinneqarsinnaatitaanermut ilaanngimmata.

Inatsisartut Allattoqarfia soorunami periarfissaqarpoq akuersinissaminut aningaasartuutit takujumaneqarpata inatsisini aalajangersakkat naapertorlugit - tassa imaappoq, Siulittaasoqarfiup qinnuteqaatinut akuersinissaminut pisussaaffii pillugit aalajangersakkat malinngikkaluarlugit.



Demokraatini nalunnigilarput Siulittaasoqarfik arlaleriarluni taamaaliortarnikuusooq - kisianni Siulittaasoqarfiup nammineq aalajangertussaavaa akuersiumanerluni imaluunniit Inatsisartuni imaluunniit Inatsisartut allattoqarfiani aningaasartuutit pillugit allattugaatinik takujumalluni qinnuteqaammut itigartitsissanerluni.

Demokraatini isumaqarpugut tamanna tunngaviusumik kusanarpallaanngitsoq. Pisortat aningaasaliissutaannik atuineq pillugu kikkulluunniit ammasumik paasiniaasinnaatitaasariaqarput aamma Inatsisartut Inatsisartullu allattoqarfiani atuineq eqqarsaatigalugu.

Demokraatini taamaattumik siunnersuutigaarput, Inatsisartut Suleriaasianni, aalajangersarneqassasoq aningaasartuutit suulluunniit Inatsisartut aamma allattoqarfiata pilersitai tamanit paasiniarneqarsinnaassasut aamma kinaluunniit paasiniaasinnaatitaassasoq. Aalajangersagat assersuutigalugu suleriaatsimi kapitel 12-mut "Inatsisartut katersuuttarnerat ataatsimiittarnerallu" ilanngunneqarsinnaavoq. Kapitalimi tassani qulequtaqarpoq paasitinneqarsinnaatitaanermut tunngasumik.

Siunnersuutigineqartut aalajangersagaq tunngavigalugu tamat (innuttaasut tusagassiuutillu) Inatsisartut Inatsisartullu allattoqarfiani aningaasartuutigineqarsimasut tamaasa pillugit paasitinneqarnissaminnut piumasaqaateqarsinnaanngussagaluarput.

Siunnersuutigineqartoq akuerineqartuugaluarpat ersarissarneqassagaluarpoq Inatsisartut aamma (soorunami) pisortat aningaasaataannik atuineq pillugu ammasumik akisussaassusilimmillu ingerlatsisoqarnissaanut illersuisuusut. Taamatut oqaaseqarlunga Siulittaasoqarfiup akissutissaanut qilanaarpunga taamatullu partiit allat oqaaseriumaagassaannut.

Partiit allat oqaaseriumaagassaannut Naalakkersuisullu akissuteqarnissaannut qilanaarpugut.

Aningaasarsiornikkut allaffissornikkullu pisortanut kingunissai

Naatsorsuutigaarput allaffimmiut suleriaatsimik allannngortitsisussat, nutserneqarnissaa ilanngutereerlugu, qaammatit pingasut sinnernagit atorumaaraat.

Siulittaasoqarfiup (Allattoqarfiup) pisortat ingerlatsinerat pillugu paasitinneqarsinnaatitaanermut inatsit naapertorlugu aningaasaqarneq pillugu allattugaatinik takujumallugit tamanit qinnuteqaatit suliarisareerpaat. Taamaattumik naatsorsuutiginnigilarput siunnersuut aningaasarsiornikkut allaffissornikkullu immikkut artukkarsuutaassasoq kikkut tamat allattugaatinik paasitinneqarsinnaatitaalernissaat pillugu Suleriaatsimi aalajangersagaqalernera pissutiginnarlugu. Tassunga atatillugu oqaatigissavarput aningaasartuutitut uppersaaterpassuit takujumallugit qinnuteqartoqassagaluarpat soorlu ilanngussat ukiumut arlalinnut tunngasut pineqassagaluarpata, taava allattoqarfimmut periarfissaasinnaasariaqarpoq



allattugaatinik takujumasumut orniguteqqusisarnissaq allattugaatinik immikkoortiteriartorluni aamma assiliartorluni - soorlumi Naalakkersuisut eqqarsaatigalugit tamanna periarfissaareersoq malittarisassat atuuttut naapertorlugit.

Aningaasarsiornikkut allaffissornikkullu inuutissarsiortunut namminersortunut kingunissai.

Soqanngilaq

Aningaasarsiornikkut allaffissornikkullu innuttaasunut kingunissai

Siunnersuut akuerineqassagaluarpat innuttaasut periarfissaqalissapput assersuutigalugu ataatsimiititaliat angalanerannut tunngatillugu aningaasartuutiniik paasitinneqarnissaminut. Ammanerusumik ingerlatsisoqalissagaluarpoq paasiuminarnerusumillu.